

西石梁農圃便覽

秋

虹見西方青雲覆之冬多寒人病瘡苦濕赤雲覆之冬旱黃雲覆之米賤白雲覆之冬多風黑雲覆之冬多雨雹主稻遲熟暴雷名天收百穀虛耗不實秋雷忌甲子曰主歲大凶人多暑死

秋三月謂之容平天氣以急地炁以明早卧早起與雞俱興使志安寧以緩秋刑收斂神氣使秋氣平無外其志使肺氣清此秋氣之應養收之道也逆之則傷肺秋炁燥宜食麻以潤之禁寒飲并穿寒濕內衣肺病宜食黍桃葱三秋服黃芪等九

三兩劑。却百病。肺氣旺。味屬辛。金能尅木。木屬肝。肝主酸。當秋宜減辛增酸。以養肝氣。立秋以後。稍宜和平。將攝。但凡春秋之際。故疾發動。切須安養。不宜吐汗。令人消鑠。以致臟腑不安。清晨睡覺。宜閉目嚙津。以兩手搓熱。熨眼數多。能明目。腦足俱宜凍。戒溫煖。瘧疾用常山青皮各壹錢。烏梅壹箇。甘草五分。枳殼草果。檳榔各二錢。姜三片。棗二枚。水二鍾煎八分。溫服。又方。用常山末。雞子清和丸。如桐子大。每服三十九。空心溫酒送下。又

方用常山草果柴胡甘草各等分水二鍾煎八分
露壹夜臨發日預溫服 又方常山半斤水熬過
七分入紅棗半斤同煮乾去常山將棗曬乾瘡者
臨發清晨空心用姜湯嚙下七枚重者服三次忌
生冷葷油猪羊肉蛋麪壹切發物半月 瀉泄用
蒼朮厚朴姜製陳皮猪苓澤瀉白朮土炒茯苓白
芍炒各壹錢肉桂甘草各二分姜三片棗二枚水
二鍾煎八分空心服治脾胃不和腹疼作瀉陰陽
不分如水瀉加滑石壹錢暴痢紅白去肉桂加木

香檳榔黃連久瀉加升麻壹錢如濕加防風升麻
各壹錢如食積加神麴麥芽山楂各壹錢濕瀉
用猪牙草醋煮九次曬乾爲末每服壹錢二分如
小兒服五六分水瀉米湯下紅痢陳茶下白痢煨
姜湯下裡急後重吳茱萸湯下又方用茯苓猪
苓白朮土炒澤瀉山藥訶子去核陳皮蒼朮肉豆
蔻砂仁各八分官桂甘草各二分烏梅壹箇姜三
片燈心三十寸水二鍾煎服小兒水瀉用烏梅
十枚去核黃連三分咀片將黃連入梅肉內炭火

燒出白烟爲度。取出冷過。研細末。用米泔水調服。或搽乳頭上。吮乳卽帶下。痢疾三日後。用罌粟殼溫水泡。去頂蒂筋。劍蜜炙黃色。三錢。炙甘草二分。烏梅打碎壹箇。蜜壹兩。沖入滾水。碗蓋少時服。痢疾香連丸。廣木香四兩。公丁香壹兩。黃連壹兩。檳榔四兩。熟大黃六兩。山楂肉六兩。共爲細末。水滾成丸。如菉豆大。每服三錢。紅痢紅糖水下。白痢白糖水下。痢疾初起卽服更妙。痢疾不論紅白。用檮白皮。地骨皮。粗葛根。米各三錢。水煎露壹

宿清晨入蜜少許溫服。休息痢用烏梅肉、夷茶、乾姜爲丸服。木槿花焙乾爲末，紅痢用白者，紅糖下，白痢用紅者，姜湯下。陳皮、枳殼、厚朴各壹兩，飯焦五兩，各炒黑，共爲末，每服三錢，黃酒下。或用麴、焦飯各等分，炒黑爲末，每服三錢，黃酒下。或用陰乾蘿蔔煮水服，或用鮮蘿蔔英搗汁入蜜調服。禁口痢用糞中蛆洗淨，瓦上焙乾爲末，每服壹二匙，米飲調服，卽思飲食。秋日勿多食薑。

稻遇秋旱未至枯死者，得大雨速連鋤之，尙可有獲。

豆角嫩者滾水焯熟晒乾眉豆同

番瓜乾晴明日摘將壞小番瓜切薄片卽日晒乾美
同乾筍不壞者不佳

神仙雞用本年小雞壹隻擇毛去腸洗淨腹內入塩
少許花椒數粒葱白二枝鍋內置水碗餘燒滾架
雞其上瓦盆蓋嚴用草十四兩細燒鍋底卽熟

賦

積芳兮選木幽蘭兮翠竹上蕪蕪兮陰景下田田
兮被谷左蕙畹兮彌望右芝圃兮寓目山霞起而

削成水積明以經復於是蔽風闔之藹藹聳雲館
之迢迢周步檐以升降對玉堂之沈寥追夏德之
方暮望清秋之始飈藉晏私而游衍時晤語而逍
遙爾乃日棲榆柳霞照夕陽孤蟬已散去鳥成行
惠風湛兮帷殿肅清陰起兮池館涼陳象設兮以
玉瓚披蘭籍兮咀桂漿仰徽塵兮美無度奉英軌
兮式如璋藉高文兮清談預含毫兮握芳則觀海
兮爲富乃游聖兮知方

謝朓

詩

日照前窗竹。露濕後園薇。夜蛩扶砌響。輕蛾遶燭
飛。陽休之 田野安吾拙。襟期頗自由。已滋蘭九

畹。未種橘千頭。日月閑窮巷。乾坤老素秋。向來飛
動意。寂寞對吳鉤。王世懋 秋來東閣涼如水。客

去山公醉似泥。困卧北窗呼不醒。風吹松竹雨淒
淒。蘇轍 葦風荷露逼人寒。午夢天高眼界寬。落

落與誰同此意。纖纖初月上雲端。僧貫休 蘿屋

無隣長閉門。芙蓉秋水自成村。退耕喜及筋骸健。
小築欣看松菊存。農圃生涯共伏臘。江湖身世任

乾坤更堪心跡雙清處。風竹蕭疎月。壺痕。張祥鸞

無數繁華過眼消。半生貧賤果誰驕。違時莫鼓
齊門瑟。懷古徒憐季子貂。衣製荷輕風。颯颯英餐
菊。晚露蕭蕭。茅簷不到逢迎客。明月當杯。每自邀。

詞

深院靜。小庭空。斷續寒砧。斷續風。無奈夜長人不
寐。數聲和月到簾櫳。李後主搗練子

蛩聲泣露

驚秋枕。羅幃夜濕。鴛鴦錦。獨卧玉肌涼。殘更與恨
長。陰風翻翠幌。雨澁燈花暗。畢竟不成眠。鴉啼

金井寒

秦少游菩薩蠻

烟草凄凄小樓西。雲壓

雁聲低。兩行疎柳。豈絲殘照。數點鴉棲。春山碧

樹秋重綠。人在武陵溪。無情明月。有情歸夢。同到

幽閨。劉基眼兒媚

七月

是月也。清風戒寒。農乃登穀。天子薦新。此月爲

孟秋。首秋。初秋。上秋。涼月。相月。天火。午。地火。

辰。荒蕪亥。九焦酉。糞忌酉。雷大吼。主有

急令。有三卯。田禾熟。無則早種麥。朔日風雨。

人不安。米貴。南風禾倍收。雷鳴損晚禾。三日有

霧年豐。八日得滿斗。秋成。十五日爲中元。乃
大慶之月。當地官較籍之辰。是白帝乘時之運。道
藏經云。是日乃太上老君同元始天尊會集降福
世界。昔有設盂蘭盆齋者。綱目特書示訓。國家
於是節。則設厲壇之祭。蓋因民俗以均惠於幽明。
仁政無遺耳。然則北人最重墓祭。爲子孫者。追遠
是勤。隨時盡孝。固不可泥古禮而失永慕。亦不可
懈時日而有先後也。雨收乾稻。百日來霜。十
六日月上早。主收稻。有雲罩上遲。秋雨多。雨主來。

年荒。是月勿食生蜜雁獐肉。勿多食猪肉。

伐木修樹培葱。

澆桂花。但忌用肥。

種白菜黃瓜水蘿蔔。同蒿蔓菁瓢兒菜菠菜。

稷八九分熟便刈。少遲遇風卽落。將地種蕎麥。或稀種綠豆。秋後塌起種麥。

澆牡丹七八日壹次。有雨少澆。

澆蘭三日壹次。蚯蚓傷根。皂角煎湯同尿灌出之。仍以清水換去鹹味。如有蟻用腥骨引而棄之。

壅芋。月初在芋旁掘土培根，則結子圓大，糞壅更好。月內連壅二次，失壅則瘦。拔芋葉，劈其梗，曬乾，刈藍打靛，用風泛石灰。凡風泛者，以手握之如麪，不成塊，置炕上，怕返潮。若握之成塊，乃水泛者，不佳。藍藉燒灰棄於道路，馬畏之。駒遇輒死，故秦有禁。染藍用小藍，每擔用水壹擔，將葉莖細切，鍋內煮數百沸，去渣盛汁于缸，每熟藍三停，用生藍壹停，摘葉于瓦盆內，手揉三次，用熟汁澆，按濾相合，以淨缸盛，用以染衣，或綠或藍或沙綠。沙藍染工俱干。

生熟藍汁內斟酌割後仍留藍根可再割或留至
開花結子收來春三月種之

種蕎麥在立秋前每中畝用種二升密則實多稀則
實少種遲則收微如霜早割取晒乾爲菜或飼牛

詩

大儀幹運天廻地游四氣鱗次寒暑環周星火旣
夕忽焉素秋涼風振落熠燿宵流吉士思秋實感
物化日與月俱在萬代謝逝者如斯曾無日夜嗟
爾庶士胡寧自舍

張華勵志

商風初授辰火微

流朱明送夏。少昊迎秋。嘉禾茂園。芳草被疇。于時

秋游。以豫以休。

潘尼

獨坐小窻下。幽蛩不絕鳴。

青天孤月淨。滿耳是秋聲。

潘女郎

清風望不及。

迢遞起層陰。遠水兼天淨。孤城隱霧深。葉稀風更落。山迥日初沉。獨鶴歸何晚。昏鴉已滿林。

杜子美

詞

七月新秋風露早。蓮渚未折庭梧老。是處瓜花時節好。金樽倒。人間綵樓爭祈巧。萬葉敲聲涼乍到。百里啼晚烟如埽。漏箭初長天杳杳。人語悄。那

堪夜雨催清曉。歐陽修漁家傲

早起未梳頭倦

倚高樓添些半臂掛簾鉤剪剪輕風來拂面微帶
溫柔鶯老燕含羞交付輕鷗荷花十里蓼花洲
對對雙雙眠水上賣弄新秋

陳繼儒浪淘沙

立秋 在六月晦旱稻遲 值朔日人多疾 值火日

老人不安地震牛羊死應在來年正月 值巳酉

日多晴 風涼吉熱主來年災旱疫 風從乾來

暴寒多雨坎來冬多雨雪陰寒艮來爲逆氣穀不

熟稻有災糴貴震來秋多暴雨人不和草木再榮

異來凶離來多旱坤來五穀熟田禾倍收兌來秋
多雨霜重。是日西方有雲吉申時西方有黃雲
如羣羊坤氣至也宜穀赤雲亦吉如無赤黃雲氣
萬物不成地震牛羊死應在來年正月 黑雲相
雜宜桑麻豆如無此氣則歲多霜人病應在來年
二月 虹見西方萬物皆貴 有雷損晚禾大抵
秋後雷多晚田不收 雷雨折木主多怪異 立
秋後稻秀豆花雨不厭多吾鄉故有壹處下雨壹
處收之諺又云七月不得盪必定是豐年 秋後

雲興若無風則無雨。是日沐浴令人皮膚粗燥。後七日去手足甲燒灰服之滅九蟲三尸。

踏露麴立秋取稻葉朝露和白麴五升純糯米麴二升去皮尖杏仁四兩去梗青花椒少許和成塊黃蒿包掛衝風處四十日取用。

晒皮衣毡毯立秋節內最生虫時也遇天晴卽晒晾不厭其勤封在甕內置炕上者常令炕溫。

鋤豆最爲緊要未鋤兩遍者急速趕完乃犁戶有壹遍不鋤者主人亦聽之尙可以謀生乎當查現在

未鋤豆田條段開寫壹冊逐日親查添工速治務必鋤完若至處暑更無濟矣。

辣蘿蔔出土卽鋤至此節當定科務費細工薅蕪使疎密得宜。

割黍乘濕卽打則稭易脫遲則稭着粒上難脫塢則不粘稭用困盛勿令浥濕黍穰不可鋪床醉卧其上令人生癩落眉髮。禮王制庶人春薦韭夏薦麥秋薦黍冬薦稻韭以卵麥以魚黍以豚稻以雁祭有常禮薦者遇時物則薦黍爲五穀之長故祭

先王爲上盛然則中元祭墓麥麩夾黍糕爲供不
亦可乎。割黍後將地鋤壹遍鋤去黍荏使地力
歸於豆角既可多結又宜麥。理黍苗作茗帚。

割穀稔食貨志云力耕數耘收穫如盜賊之至故熟
速刈乾速積刈早則傷鎌刈晚則折穗遇風則收
減濕積則藁爛積晚則粒耗連雨則生耳所以收
穫須及時也收穫者農事之終可任意早晚而棄
前功乎。照俗割稔多先置坡下俟乾方搬恒被
偷竊近溪河者又有漂沒之患當督速搬。犁戶

割秣必逐段報數記冊，自己仍逐段查之。搬時在場點數上垛，莊農原煩碎，不可托大也。秣穰晒乾，梁好，喂養牛驢，因地不產穀，蘇草甚少，若秣穰，儻壞，牲畜何資？

塌地務早，以爛夏草看白背，卽耙平，防秋旱。若雨過，再犁轉，候種麥。犁轉之地，務必耙細，萬不可透風出糞。

拔早黃瓜藤，刨起，候種蒜。

腐乳用細腐乾切象棋子大，蒸透，卽用籠盛着，速以

稻草鋪蓋七日發露如長毛取出黃酒洗淨加紅
麴花椒茴香炒鹽末浸以白酒娘二十日可用或
用乾蒸酒浸酌加醬黃

燒茄用醬三兩油三兩茄十枚去皮蒂排鍋內盆蓋
燒候軟如泥入椒鹽拌加蒜更妙

醃黃瓜稍瓜或整用或開兩片去淨子瓢細擦鹽醃
過宿棄汁取晒至晚另擦鹽醃次日取晒留汁另
貯至晚再醃次日再晒俱貯汁候用看瓜晒出鹽
甬便不用醃排罈內將前汁熬數滾候冷浸之

黃瓜切兩片去淨子瓢。鹽醃三日。取晾半日。入滷醬
十餘日。滾水眼冷。洗淨。眼乾。入好麪醬醃。極嫩
黃瓜。整醃之。尤肥美。茄同法。

處暑

此節當查塌地之勤惰。凡帶種之豆。盛則留。否則
塌。不可糊塗留連。倒糞尤要緊。處暑前三日。出
完糞。砍秫畢。卽專人倒糞。蓋糞四遍。始細。白露七
八日。卽當種大麥。若糞不細。能不束手。况有陰雨
阻隔乎。此後割韭。必用糞壅。

砍蜀秫。理飯帚。秫粒必連晒方乾。若少濕必黴。刈糲作小束。晒乾池內漚之。俟皮爛。取糲片洗極淨。晒乾潔白如雪。糲杆晒乾劈成條。蘸硫黃用以取火。名引光奴。或趁濕用草灰培。換灰以乾爲度。可然火。糲多者刈取晒乾。來年夏月漚之。

芍藥枝葉平土剪去。挿竹記墩。以糞壅根。

拾棉花以桃開絨露爲熟。旋熟旋摘。攤放箔上。日曝夜露。子粒旣乾。方可收貯。則絨不浥而子不腐。草束藜腰并培其根。

醃韭花於韭花半結子時收摘去梗蒂每斤用鹽三兩同搗爛入罐先別用鹽醃小茄小黃瓜醃出水眼二日入韭花拌勻用錢三四文着罐底收貯
刈麻束宜小漚清水中俟生熟恰好取晒
栽葱培作蔥花

曬麵夜承露水勿見霜着雨

泡甜醬用火日先將晒乾黃子濕布拭淨碾爲末粗羅羅過每斤用水二斤淨鹽四兩入鍋熬沸取出澄清候冷去脚入黃麵泡之

甜醬瓜先將苦瓜去瓢十斤用石灰白礬各兩半煮水極沸取出候冷去渣泡瓜壹晝夜取出洗淨酌用塩醃過宿滾湯掠過晾去水氣不可日晒揀去爛者再加稍瓜黃瓜去瓢嫩茄子不拘多少每斤用醬黃壹斤炒塩四兩將數內塩醃瓜茄過宿次日入醬黃拌勻盛甕中清晨盤入盆內日夕盤入甕中十餘日卽成或將苦瓜同前法製過揀去爛者每斤用醬黃壹斤炒塩四兩拌勻入甕四十日取瓜少帶醬入罈收餘醬或食或再醬蔬菜

糖醋瓜用苦瓜壹斤切小塊加鹽兩半醃過宿將汁
漉出煎滾候冷入瓜拌晒二三日再加好醋半斤
白糖四兩椒茴砂仁末紫蘇橘絲姜絲少許拌勻
數日可用

黃瓜茄子不拘多少先用醬黃鋪在缸內次以鮮瓜
茄鋪壹層鹽壹層又下醬黃瓜茄鹽層層相醃五
七宿烈日晒之欲作乾瓜取出晒之

瓜丁用苦瓜二斤切小塊加鹽八兩醃過宿漉起將
滷入水半斤煎滾掠過晒半乾用好醋壹斤煎滾

候冷將瓜同姜絲紫蘓嫩苗香梗加白糖半斤拌勻收貯。

糖醋茄用嫩茄切三角塊沸湯掠過布包壓乾鹽醋醃壹宿曬乾加生姜紫蘓橘皮絲苗香末拌勻煎滾糖醋澆曬乾收貯用時以湯泡過香油燂用。

鵪鶉茄用嫩茄切細縷淖過控乾以鹽醬椒苗陳皮甘草末拌曬蒸收用時以湯泡軟香油微炒。

芥末茄用嫩茄切條不洗曬半乾多着香油加鹽炒熟晾冷用乾芥末拌和磁罐收。

茄乾大茄切三片小二片河水浸半時撈入鍋內加
鹽用水煮壹滾取出晒至晚仍入原湯再煮壹滾
留鍋內明早又煮滾取晒至晚如前再煮以湯盡
爲度晒極乾入罈收。稍瓜去瓢汁夏布拭過絲
瓜去粗皮俱照上法做。又法大茄煮熟劈開用
石壓乾趁日色晴先晒磚瓦令熱攤茄于上晒極
乾收正二月和物食之其味如新。又方茄切片
晒乾用鹽醬椒茴陳皮砂糖水同少煮又晒乾再
蒸少時晒乾收。葫蘆切條照上法做。

茄蕪將茄煮半熟使板壓扁微鹽拌醃二日取晒乾
放好滷醬上面露壹宿磁器收。

七夕 西南風無秕穀。雨麥麻豆賤。

道書七月七日爲慶生中會此日地官三宮九府
四十二曹同會天水二宮六宮十八府七十八曹
同考罪福是日勿想惡事況爲者乎仙家大忌。

夜洒掃中庭露施几筵設酒脯時果散香粉於河
鼓織女守夜者見天漢中有奕奕正白氣有光耀
五色以爲徵應見者便拜而乞富乞壽乞子惟得

乞壹不得兼求。三年乃言之。頗有受其祚者。本
日曝衣物。阮咸云。未能免俗。聊復爾耳。正不必如
郝隆仰卧。曝腹中書也。本日取百合。熟搗。新瓶
盛。密封。掛門上。陰乾百日。每拔去白。搽之。卽生黑
者。本日取絲瓜根。燒存性。爲末。治咽喉骨鯁。溫
酒調服二錢。本日采黑脂麻。最上標頭花。陰乾。
爲末。黑麻油漬之。眉髮不生者。日塗之。卽生。又生
禿髮。採豨薟草。

詩

銀燭秋光冷畫屏，輕羅小扇撲流螢。天階夜色涼
如水，臥看牽牛織女星。杜牧 長安城中月如練

家家此日持針線，仙裙玉佩空自知。天上人間不
相見，長信深陰夜轉幽。玉階金閣數螢流，班姬此
夕愁無限。河漢三更看斗牛。崔灝

詞

梧桐墜，秋光碎。壹痕河影添嬌媚。錦梭撇，綵橋結。
今朝天上歡娛節，嫦娥疑望也。應痴絕，熱熱熱。
天如醉，雲如睡。朦朧方便雙星會。雞饒舌，催離別。

別時打筭閒年月。自從盤古。許多周折。歇歇歇。陳

眉公釵頭鳳

西風涼透梧桐院。銀河斜映珠簾

卷。鈿盒蛛絲。金針綵綫。分瓜擘果年年慣。近時

興致偏疎懶。緇紈無緒。難抽展。兒女情多。英雄氣

短。算來巧拙還相半。丁雁水七娘子

八月 是月也。日夜分。葉定禾熟。多積聚。凡可脩饑。無

不儲貯。種麥毋或失時。此月爲仲秋。壯月。天火

酉。地火卯。九焦午。糞忌申。荒蕪卯。大

盡。有水災。少菜。有三庚。三卯。低田麥稻吉。三庚

二卯麥宜高田。虹見秋米平。來春米貴。此月
雷主多盜。雨多麥難種。豆不成。米貴。牛貴。朔
日晴冬旱。畧得雨宜麥。布絹絲綿貴。油蔴少。三日
內俱宜陰雨。朔日爲六神日。取栢葉上露點眼。以
朱點小兒額。名天灸。厭疾。十壹日。卜來年水旱。
侵晨或隔夜於水邊無風浪處作壹水。則子至晚
看之。若沒主水。露主旱。平主小水。又主本年好種
麥。名曰橫港。十六夜月皎潔。來年熟。陰來年水
月戒夫婦容止。犯者減壽。朔望各十年晦日壹

年上下弦各五年庚申甲子本命二年初三日萬
神都會十四十六日三官降犯者中惡二十八日
人神在陰秋分社日并忌月內食雉肉令人氣
短食芹菜恐成蛟龍瘕發則顛狂面青黃小腹脹
食生蜜作霍亂食生果子患瘡癰食雞子傷神食
生蒜荳蔻損胆氣食姜損壽飲陰地流泉發瘧勿
食猪肺及餵和食之至冬發疽勿犯賊邪之風及
多食腥肥自此煖足勿令冷

天旱至此得雨多種芝蔴嫩時割取晒乾亦以御

冬仍於其地種麥。

澆灌芍藥瑞香並宜猪糞。

栽韭。月初掘韭去老根分植。當年勿剪。

芟菊蔬。每枝留頂上壹蔬。餘俱摘去。

穫薏苡。取其仁打碎。同粳米煮粥。日食之。大有益。

採茴香花椒。

種同蒿。水蘿蔔。菜子。油蔕菜。蒼蓬。葱。蒜。生菜。蒿。苣。菠。

菜。瓢兒菜。

刈藜。晒乾。以板壓扁。拌去子葉。再晒。再拌。以多爲妙。

子炒香。酒下錢餘。治疝氣危急。

斷冬瓜梢。以存其力。撿小者摘去。以養大者。俟經霜後摘之。早收必爛。未經霜者。常食令人反胃。

玉簪花瓣。拖麵。香油燂過。入少白糖。香清味美。取未開者。裝以鉛粉。線紮兩頭。日久猶芳。兼治雀斑。

稍瓜分兩片。去瓢。又橫切薄片。曬乾。加姜絲。糖醋拌勻。磁器盛。

食香瓜。用苦瓜切碁子塊。每斤用鹽八錢。加生姜。陳皮。絲椒。苗末。同瓜拌醃二日。控乾。日晒。晚收入汁。

如此三次勿令太乾裝罈

瓜蠶用大苦瓜切兩片去瓢畧醃出水每箇用生姜二錢陳皮五分薄荷紫蘓嫩葉少許俱切成絲茴香炒砂仁末少許用線紮成箇置好醬內七日取出切碎磁罐收

梨酒用好熟梨連皮核切大片排罈內令滿灌以上好火酒封口土埋三月取用能潤肺涼心消痰降火解毒澁精

梨膏將梨搗爛扯汁入沙鍋或銅鍋內文火熬至滴

水成珠。凡酸梨換水煮熟則甜美。

梨乾甜梨去皮切厚片火焙乾尤爲佳果。

青豆黃豆將眼蒼葉七八分熟時連褶割來摘角鹽水煮八九分熟撈出剝皮用篩盛豆灰火烘乾。

玉露霜用菜豆粉團三茶盅細羅羅過先以薄荷葉密鋪篋上葉上鋪紙壹層攤粉紙上上又用薄荷葉密覆兩三層仍用紙蓋嚴入鍋蒸之水壹滾再燒三把火便取出火候不可過入糖壹茶鍾糖亦用粗羅羅過拌勻印果如太乾入熟水少許或

將粉蒸出，磁器盛，勿出氣，用時現拌白糖印果。
新棗纔熟，乘清晨連小枝葉摘下，勿損傷，通風處晾
去露氣，用新缸無油酒氣者，清水刷淨，火烘乾，晾
冷，淨稈草曬乾，候冷，壹層草，壹層棗，入缸封嚴，冬
月勿致凍壞，傷熱可至新正充鮮品。

剝棗齊民要術云：旱澇之地，不任稼穡者，種棗則任
矣。棗全赤，撼而落之，先治地令淨，有草則令棗臭，
駕箔椽上，以無齒木扒聚而散之，日二十度乃佳。
夜不必聚，得霜露氣速成。如有雨，則聚而苦之。五

六日選紅軟者上高箔晒之。辟爛者去之。不則恐壞餘棗。其未乾者仍如法晒。

蘭當澆以腥穢以防秋風肅殺。

牡丹剪枯枝並葉上炕土五六日壹澆。

嫩藕搗碎。鹽醋拌食。可以醒酒。綠豆粉調沙糖灌

藕孔中。紫茱煮熟切片用藕切斜片則不脫。

蜜煎藕取嫩藕去皮切條或片焯半熟。每斤用白梅

四兩煮湯壹大碗浸藕壹時。撈出控乾以蜜六兩浸過宿去汁。另取好蜜十兩漫火煎如琥珀色。放

冷入磁罐收。

糖煎藕用大藕五斤切碎日晒出水氣沙糖五斤蜜壹斤金嬰末壹兩同入磁器內泥封口漫火煮壹時待冷開用。

爭藕蒸爛風前吹晾少時石臼中搗極細入糖蜜再搗令勻取出作團停冷硬爭刀隨意切食糖爲佳蜜須適中過用則稀百合芋俱可照法做藕以鹽水供食則不損口同油燂米麴果食則無渣。

酥柿用水壺甕置柿其中數日卽熟或埋河沙水中。

二日取食更甜脆與蠟同食令腹疼

柿餅用大柿去蒂捻扁日晒夜露至乾納甕中自生柿霜食柿飲酒患心疼

核桃熟時摘下溫爛皮肉取核用麝布袋盛掛當風處則不膩留種者勿摘俟其青皮裂自落乃佳嫩青黃瓜切條懸通風處成乾

甕盛芝蔴油以筯取秋葵花瓣入甕內勿犯手密封收治湯火傷以油塗之甚妙葵葉爲末敷之亦佳刀豆蒸晒作乾

葫蘆老者開瓢。湯火傷灼舊瓢燒灰。香油調敷。
煎雞用嫩肥雞。搗毛去腸洗淨。香油煎熟。醬油少加。
醋烹之。

詩

八月更漏長。愁人起常蚤。閉門寂無事。滿地生秋
草。昨宵西窗夢。先入荆門道。遠客歸去來。在家貧
亦好。我呈秋風何日疑。白露爲朝霜。柔條旦夕

勁。綠葉日夜黃。明月出雲崖。皛皛流素光。披軒臨
前庭。嗷嗷晨雁翔。高志局四海。塊然守空房。壯齒

不恒居歲暮常慨慷

張華

銀漢無聲露暗垂玉

蟾初上欲圓時清樽素瑟宜先賞明夜陰晴未可知

黃省曾

清秋山色淨簾櫳八月芙蓉滿鏡中

醉任嶺雲連海綠愁禁楓葉接天紅養魚好伴鴟夷子飲水如無桑苧翁江上美人期不到吹簫獨自向虛空

蔡羽

詞

八月豆花新過雨晴霞片片明溪嶼牛背斜陽吹笛去林鴉哺啄殘柿葉翻紅樹
端正良宵溪叟

聚金錢。蟬聲浮芳醕。杜影婆娑昏暗度。酣笑語。三
更共看蟾華吐。丁雁水。漁家傲。

白露 晴半月。倒糞耕地俱善。雨多。瓜菜生。虫牛草薺
黑。播種失時。此後驢馬當歸棚。六畜房圈及時
修理。不使受寒致疾。前塌之地。至此再轉熟。更
驗糞之粗細。七八日後。卽種麩麥。大麥。蓋旱澇常
多。若待恰好時候。恐有耽懸。故如其晚也。不如其
早。而人反謂早種長過了苗。吾鄉莊農可知矣。當
速送糞。并催犁戶。拔豆角藤。塌起種麥。製牛草。

獲脂麻簡熟者先割束欲小大則難乾五六束壹攢斜倚之使風得入候口開以小杖微擊令子出仍攢之三曰壹打五遍乃淨晒乾收其粘入米倉不蛀除夜撒之臥房內外云可辟邪單條者名霸王鞭尤能祛鬼

瓜蠹用苦瓜去淨瓢百沸湯掠過每十斤用鹽五十兩勻擦翻轉加豆豉末醎醋各半斤甜醬斤半椒苗乾姜陳皮甘草各五錢蕪荑二兩並爲細末同瓜拌勻入磁甕醃壓於冷處半月可用

十香瓜用澌過大黑豆三升姜絲壹斤橘絲三兩法製杏仁半斤椒面末各兩半白豆蔻草果甘松五味子各些須將苦瓜切丁十斤用鹽斤半拌醃二日取出晾乾同前物料拌勻入醃瓜水八碗火酒四碗裝罈令滿扎口泥封置日中輪晒月餘取用又方大黃豆二升煮熟以麩罨熟去麩嫩瓜茄各五斤切丁用鹽五兩醃過宿去水加橘絲壹斤姜絲嫩紫蘂各十兩法製杏仁八兩桂花五兩甘草五錢鹽十兩拌勻入罈按實燒酒灌滿泥封晒二日

取出拌入花椒茴香砂仁末各兩半再裝入罈泥封晒之。

做豆豉用浙中豆鼓淨十斤花椒煮水候冷洗豆晒乾再用燒酒泡壹夜搗豆看之如無乾心方加鹽料先將杏仁壹斤滾水焯去皮日換涼水浸十四日再用鹽水煮頃刻鮮姜壹斤去皮切粗條滾水焯過嫩茄六斤連皮切方塊鹽醃石壓出水晒八分乾醃透苦瓜切丁二三片嫩紫蘊橘絲各三兩官桂草果各五錢大茴壹兩小茴甘草各二兩花

椒三兩俱爲細末炒鹽二十兩同拌勻入小罇灌
以好燒酒大約浮則壞堅則不壞乾則壞濕則不
壞加醃嫩草麻子西瓜子甘露子核桃仁食之所
嗜酌量加之鹽泥封固向日輪晒四十日取用
豆豉如法拌勻入罇不用燒酒但用香油澆灌久
貯不壞第非貧士所能

水豆豉用水三斤鹽四兩煎滷冷定泡漸中豆壹斤
晒四十日加甜酒壹斤椒茴草果官桂陳皮末各
壹錢姜絲法製杏仁不拘多少拌入再晒常攪數

日裝罈封固過年更佳。

社雨來年豐。是日令兒女夙興則壽。晏起有神名。

社翁社婆者遺尿面上其後面白或黃切忌。

社日種麥必倍收。麥當早種務於秋分節內種完。若至寒露則晚矣。霜降後種麥更無益。吾鄉有云十月朔種麥。趕頭壹壩者。快人不淺。

種水蘿蔔。十月初掘起。晾四五日。入窖作種栽。

種穰麥大麥。

秋分。是日微雨最妙。或陰天。俱主來年大熟。諺云秋

分不宜晴。酉時西方有白雲如羣羊，是分氣主
大稔。有黑雲相雜，並宜蔴豆。赤雲來年旱。分社
同壹日。低田盡叫屈。主水滄田禾。秋分在社前，
斗米換斗錢。秋分在社後，斗米換斗豆。本日勿
殺生，用刑弔喪，問疾大醉，夫婦戒容止。

種麥正在此時。土欲細，溝欲深，糞欲多。種欲勻，以棉
子油拌種，則無虫而耐旱。每畝加鹽壹斗，最忌地
澆。麥大麥種，不論新陳而困塢者不可用。

穫稻畢，速耕，多送糞種麥。拌糯稻草，脩繩索之用。

收桐子晒乾用時微炒布包少許磚地上輕輕板之
簡出仁未破者再板陸續收取

掘芋擇圓長尖白者晒半乾留作種九月掘亦可芋
經霜則益美但不可凍損

收藕子晒乾收炒熟入糖煎拌芝蔴均爲佳品

分百合將根掘出取食外瓣留原根并小頭分栽肥
地內三寸壹科加雞糞常澆之二年或三年壹移
否則枯死春月忌分耳聾耳疼乾百合爲末早
晚溫水服名二錢

移木瓜貼梗海棠蠟梅。

移牡丹如天尚熱寒露亦可。須全根寬掘以漸至近。勿損細根。將宿土洗淨。再用酒洗。每窠用熟糞土壹斗。白蘇末半斤。拌勻。先下小麥數十粒於窠底。然後植於窠中。以細土覆滿。將牡丹提與地平。使其根直易生。土須與幹上舊痕平。不可太低太高。勿築實。勿腳踏。隨以河水或雨水澆之。窠滿卽止。待土微乾。畧添細土。覆蓋過三四日。再澆。封培根土成小堆。用手拍實。免風入吹壞花根。每本約離

二尺使葉相接而枝不相摩風透日不晒乃佳太密則枝相擦損花芽太稀則日晒土熱傷嫩根若欲遠移將根用水洗淨取紅淤土羅細末趁濕勻粘花根隨用軟綿花自細根尖纏至老根再用麻紮纏定以水洒之枝上紅芽用香油紙或簪綿紙包扎籠住不得損動卽萬里可致也

接牡丹須秋社後重陽前過則失期將單瓣花本如指大者離地二三寸許斜削壹半取千葉牡丹新嫩旺條亦用利刀斜削壹半上留二三眼貼于小

牡丹削處合如豈株麻紕緊扎泥封嚴密兩瓦合之壅以軟土罩以蒭葉勿令見風日向南留小戶通氣至來春驚蟄後去瓦土即用草薦圍之仍樹棘數枝以禦霜茂者當年有花

分植芍藥相離約二尺如栽牡丹法穴欲深土欲肥根欲直將土刨虛以壯河泥拌猪糞或牛羊糞栽深半尺尤妙不可少屈其根稍只以河水注實勿踏築覆以細土高舊土痕指餘勿使土裂風入栽向陽則茂

種罌粟麗春先糞地極肥鬆用冷飲湯并鍋底灰和
細土拌子兩手交撒仍用耜耩出後澆清糞刪其
繁以稀爲貴長扶以竹若土瘦種遲則變單葉

中秋 晴來年高田熟低田水 雨來年低田熟本年

澇 月光好蚌胎蕎麥實多兔少魚 無月主來

年燈時雨

月餅用白糖七兩瓜子仁核桃仁橘餅各二兩青紅
絲松子仁各壹兩桂花玫瑰不拘多少香油二兩
作餡子或加生白麵四五兩再用熟麵十兩生麵

六兩。脂油六兩。白糖五兩。加水少許。酌麵之乾濕。以軟硬得宜爲度。作皮子。包餡。少按入爐。或用白麵壹斤。白糖五錢。脂油五兩。滾水壹茶盅半。和成。作皮子。或用白麵二十兩。油五兩。五錢。糖七錢。五分。溫水合成。又作酥。加入。其酥用蒸熟。晒乾。重羅。白麵十兩。油三兩。擦成。每麵皮壹兩。三錢。酥七錢。包住。趕開。卷起。又趕。三次。方勻。共重二兩。作皮。凡熟麵不可炒胡。

詩

九十日秋色。今朝已中分。孤光含列宿。四面絕纖

雲。衆木排疎影。寒流淚細紋。

廖凝

秋月仍圓夜

江村獨老身。捲簾還照客。倚杖更隨人。光射潛虹

動。明翻宿鳥頻。茅齋依橘柚。清切露痕新。

杜甫

少皞磨成白玉盤。六丁擎出太虛寬。清光千古復

萬古。留向人間此夜看。

黃省曾

常時好月賴新

晴。不似今朝此夜生。初出海濤疑尙濕。漸來雲路

覺偏清。寒光入水蛟龍起。靜色當天魍魎驚。不獨

坐中堪仰望。孤光應到鳳池明。

秦韜

玉宇沉沉

夜氣寒。金飈颯颯。桂香殘。人憐此夜重輪滿。天與
中秋兩度看。小沼芙蓉添暮色。深杯醺醖。借餘歡。
佳期勝會還能再。解道山中歲月寬。申瑤泉閏月
中秋

詞

憑高眺遠。見長空萬里。無雲留跡。桂魄飛來光射
處。冷浸。豈天秋。碧玉宇。瓊樓乘鸞來去。人在清涼
國。江山如畫。望中烟樹歷歷。我醉拍手狂歌舉。
杯邀月。對影成三客。起舞徘徊風露下。今夕不知

何夕便欲乘風翻然歸去何用乘鵬翼水晶宮裡
壹聲吹斷橫笛

蕪東坡

榕陰覆水弄新晴涼颼

蘋末生殷勤勸客換犀觥蟾華今夜明珠箔卷
澱紋平龜魚藻影橫壹分秋作十分清人如月有
情

丁雁水醉桃源

九月 是月也霜始降百工休農事脩務畜菜蔬伐薪
爲炭此月爲季秋暮秋末秋暮商季商杪商 天
火子 地火寅 九焦寅 糞忌巳 荒蕪未

九月物不凋三月草木傷 霜不下三月多陰寒

庚寅辛卯雨冬米貴。雷鳴穀大貴。上卯日
北風東風三月七月米貴。虹出西方大小豆貴。
朔日至九日主來年正月至九月西北風其月
米貴。又豫童書云凡北風其月穀賤姑雨存其說
以俟靜觀。朔日值寒露主冬寒嚴凝值霜降多
雨來年豐晴萬物不成小雨吉風雨主來年春旱
夏水米貴虹見麻油貴人災東風半日米麥貴。
十三日晴壹冬多晴雨則多雨十四更靈。是月
肝氣微肺金用事當增酸以益肝氣助筋血月末

十八日當省甘增鹹以益腎氣。二十日齋戒沐浴爭念必得吉事。天祐人福。雞三唱時沐浴令人辟兵。二十八日陽氣未伏陰氣既衰宜沐浴服袂衣補養之藥。是月勿食血脾。季月土旺在脾。食犬肉傷神氣。食霜下瓜。冬月翻胃。食生冷作痢。食野鴨鴉雞等肉損人神氣。勿以猪肝和飴同食。至冬成嗽病。月忌夫婦容止犯者減壽。朔望各十年晦日壹年上下弦各五年。庚申甲子本命二年。二十八日人神在陰切忌。

割豆。大黑豆易爛不可等十分熟。豆葉當速收。栽蒜當在八月內。若陰雨失時。至九月。則太遲。速於月初。在蒜畦中。稠栽蒜瓣。俟來年二月初。先刨地數次。多加糞。再倒勻。持木搨。揀壹竅栽壹科。栽訖常以水澆。蒜大如拳。

牡丹五六日壹澆。頻則發秋葉。來春不茂。若天氣寒。更當稀澆。

摘黃熟茄種。劈四瓣。或六瓣。晒極乾。懸之。

醬茄。用秋後嫩小茄。蒸熟。布包壓淨水。晾乾。入甜醬。

內月餘取用。鹹醬內小茄切片炙腫毒甚效。

拌醬油凡斲中麩壹斗加豆四升磨破煮熟連汁拌
麩入鹽四升如豆汁不足添熱水拌以手握汁順
手了流爲度貯罈內盆蓋泥封口晒用時以胡大
麥湯淋出椒茴同大黑豆熬至豆皮縐爲度去豆
收貯。

熟柿去蒂入好麴末蒸酒浸沒封口來春取用。

酸棗取紅軟者箔上晒乾入鍋加水僅掩棗煮沸卽
漉出入盆研布絞取濃汁塗器上晒乾取爲末遠

行和米炒鮮饑渴甚妙

做酒娘用純糯米水泡透蒸飯盛篩內置盆內澆以冷水水流盆內約少半盆另貯候用再以冷水澆飯以冷爲度復以先澆原汁澆飯過酌留原汁每壹升米之飯加原汁兩飯碗酌量拌麴子盛小盆內外又盛以大盆盆內填碎稻草最怕傷風三日來漿常以漿澆飯七日便熟出漿壹半另貯瓶內重湯煮熟候用留漿壹半在糟內每斤用鹽三錢或二錢拌勻入罈數日糟物大約米壹升可得糟

六斤餘糟三斤可糟魚五斤

詩

藜杖侵寒露蓬門啓曙烟力稀經樹歇老困撥書
眠秋覺追隨盡來因孝友偏清談見滋味爾輩可
忘年杜少陵秋聲蕭瑟客途中河柳衰黃野草

紅獨有蓼花顏色好霜寒臨水耐西風先君淮于
雜咏秋盡千山木葉稀草堂蕭索對斜暉黃花

帶露籬邊濕白鳥依人宇下飛車馬已辭當路客
芰荷猶剪舊時衣求羊不見來相訪獨醉清樽賦

采薇方九功

卧疴數月久忘機造化何須嘆不

齊出入滌園甘抱甕沉酣蝶夢怕聞雞微軀活計
參苓藥晚歲生涯松菊畦濁酒三卮成薄醉窗前
蕉葉任情題西風颭颭布帷穿壹榻蕭條怯蚤
眠垂老何須干薄祿尊生正好坐枯禪菊開喜酌
茱萸酒霜落閒看鴻雁天子鶴妻梅林處士誰云
猶未斷塵緣

先祖瘦竹集

詞

黃菊枝頭破曉寒人生莫放酒杯乾風前橫笛斜

吹雨醉裡簪花倒着冠。身健在且加餐。舞裙歌
板盡清歡。黃花白雲相牽挽。付與時人冷眼看。黃
魯直鷓鴣天

寒露 前後有雷電。主次年有水。風自東來。半日不
止。主米麥貴。有風雨。主來年春旱夏水。

割豆正在此時。遲則有崩爛之患。而麥未種完者。
又急須速種。又農人極忙時也。添工料。聖勿遲。
移竹。培竹。培蔥花。

鋤蘿蔔。擘其黃葉。晒乾收。

移茉莉北房簷下見日不見霜大寒移入暖處圍以草薦盆中任其自乾至乾極畧以河水盪許澆其根枝葉上有白色小虫刮去冬天更勿透風氣菊花隔日澆肥則花大色濃植在地者登盆賞玩去荷缸水荷梗塞穴鼠自去煎湯洗鑽自新

收松柏子過時則零落又易生蛀各貯晒籠開子出覆以絛紗免爲雀食見霉則不生

醃韭將韭洗淨空去水切二指長每韭壹斤用鹽壹兩三錢壹層韭壹層鹽醃三日翻數次裝入罐內

原汁香油浸之。

蝙蝠茄用嫩茄切四瓣滾湯煮將熟樹好醬上俟稍鹹取出加椒末麻油入籠蒸香籠內托以厚麪餅盛油或煮熟晒乾用時滾水泡透去蒂中木絲加香油醬油椒苗末炒熟

酸菜用肥嫩白菜摺少煮不可太熟取出冷透入罐內溫小米飯清湯浸之勿太熱不用鹽纔酸便用陸續添湯菜可竟冬食

收烟種

種菠菜蒿苳。

刈蕎麥其穢燒灰淋汁洗六畜瘡甚效或熬乾取齧
蜜調塗爛癰疽蝕惡肉去腐瘵最良蕎麥麵硫黃
末各二兩并華水和作餅晒乾癰疽發背壹切腫
毒用餅磨水傅之痛則令不痛不痛則令痛卽愈
割棘子爲芷牆之用

刈麻頭打種晒乾收。

霜降 本日見霜來年清明日霜止或前或後日數皆
同霜來晚霜止亦晚百果遇霜花則不結實。

此後種麥已晚極必不收但遇久雨不得種至此晴霽不得不種不過安佃戶之心究無益也每畝加種半升多用糞耙地令細免凍死麥苗麥若未種足來春勢必種大麥以足其數當趁此時將地場起送糞俟春凍初解卽種如未出九用冬大麥種此後當秋耕地將豆葉掩入地中來春田禾自盛牛須喂料若牛具軟弱耕半亦可然必晌午露乾方可耕若掩霜入地來春多折苗搭牛棚遇雨雪拴棚內此後勿割韭滌酒器

收雞冠花。婦人白帶用白者。赤帶用赤者。晒乾爲末。空心酒服三錢。紅者亦治經水不止。同上法服之。忌魚肉。痢疾雞冠花煎酒服。赤用紅。白用白。拾臭棘子。

刷山藥。此蔬健脾益腎。最宜常食。篩盛置簷風處。不見日陰乾。甚妙。

起辣蘿蔔。必待微凍後。晾七八日。入窖。帶莖蘿蔔懸之簷下。煮水治痢止嗽。愈久愈妙。

栽菜子。勝春栽者。

醱種菊土黃壤赤壤爲上沙壤黑壤次之俱在每歲
秋盡冬初擇高阜肥地將土掘起潑以濃糞篩過
雜以雞鷲糞令肥用草苫蓋之正二月再醱壹次
腐乳用絹過細豆腐十斤切四方小塊入炒塩二十
二兩醃七日另倒入別器使在下者在上又過七
日取晒半乾用漿酒調醬黃成糊將腐排磁罐內
每層加醬糊壹層上留二指空將醃腐塩汁再添
漿酒灌滿封固兩月後開用如無漿酒用好蒸酒
好燒酒亦可酌加椒茴紅麴末亦好

做酒淘米欲淨洗器務潔翻糜必快蓋缸須遲生水
盞汁遭之卽壞苦酒每黃米壹斗用晒好麴麴
麴二升若麴平常少增之露酒用糯米四升黃
米六升露麴麴壹升二合露麴勿用陳者

糟烏蛋先將烏蛋泡過宿擇淨晒乾臨時用火酒洗
過入糟加細鹽椒苗末不用香油糟蝦米同

糟魚將上好鹹魚水浸去鹹味再用石灰煮水冷定
洗過晾乾再用好火酒洗過壹層魚壹層糟裝罈
將椒苗細末入香油內層層澆之封固四十日取

用大約糟三斤可糟魚五斤若欲久留過夏者魚同前法洗過每十斤用糟五斤入罈半月後取起拭去舊糟另用再以火酒洗過照前糟之

糟白菜將肥嫩不蛀好菜搭陰處晾乾水氣俟葉稍俱軟每二斤用糟壹斤塩四兩拌勻糟菜相間隔日壹翻騰十日後取起拭去舊糟另用好糟壹斤塩十兩糟菜三斤糟菜相間隔日壹翻騰待熟挽定入小罈上澆糟菜汁封固

大頭菜用好芥菜洗淨菜頭擘爲四瓣繩繫陰乾送

菜猶俱軟，擇去黃葉老梗，每斤用炒研細鹽三兩二錢，分作數次，着力擦根，稍揉梗葉，俟鹽入菜，仍早晚揉搓倒弄，半月後取晾十日，加椒苗末入心，以便窩起，入罈填極堅，泥封，置冷處，勿受地氣。

辣菜用芥根切細條，曬乾，用滾水壹淘，卽取出，酌量加鹽畧揉，再加椒苗末、熟青豆、芝蔴、少入香油，拌勻，貯罐內，又將蘿蔔切細條，少鹽揉汁，澆入，卽以蘿蔔絲填罐口，蓋以蘿蔔片，碗封口，三日可用。或切粗條煮熟，閉之罐中，上蓋蘿蔔片，三日後可

用蘸以醋油。

芥脯先以鹽醃芥葉去梗將葉鋪開如薄餅大用陳皮杏仁砂仁甘草花椒茴香細末撒菜上更鋪葉壹層又撒物料如此鋪撒五重以平石壓之篋上蒸過切小塊調豆粉稠水蘸過入油煤熟冷定磁器收。

芥壘用青紫白芥菜切細條沸湯焯過帶湯撈入盆內與生蒿苣熟芝蔴白鹽拌勻投入礮內三日後變黃可食至春不改味。

微乾菜芥梗葉百斤用鹽二十二兩拌勻或盆或鉶
重疊放定壓以大石醃數日出水浸過石撈起晒
乾以原汁煮半熟再晒乾蒸過置乾淨甕中任留
不壞出路作菜極便六月伏天用炒過乾肉復同
菜炒可數日不壞若醃芥汁煮黃豆并極乾蘿蔔
丁晒乾收貯經年可食

蘿蔔乾以蘿蔔切骰子大晒乾用醃芥滷汁加花椒
小茴香同煮再晒乾或以芥滷煮後晒乾拌椒茴
末收貯

淡芥菜將菜切碎淡醃布包石壓乾少加鹽花椒茴
末放小罈內按極堅實竹衣封口地上洒草灰將
罈口朝下放之

草束窩心白菜

九日 是雨歸日此日雨主來年熟無雨冬晴雨則冬
至元旦元夜清明四日皆雨晴則皆晴東北風
來年豐西北風來年歉是日採豨薟草採木
芙蓉葉陰乾爲末以井水調貼疔腫油調敷湯火
瘡又治各種腫毒效驗不可枚舉當珍重之

謝無逸以書問潘大臨近作新詩否答曰秋來景物件件是佳致昨日清卧聞擾林風雨聲遂起題筆曰滿城風雨近重陽忽催租人至敗意止此壹句奉寄 蘓東坡與李公擇書秋色佳哉想有以爲樂人生惟寒食重九慎不可虛擲四時之景無如此節 汝南桓景從費長房游學長房謂曰九月九日汝南當有災厄急令家人縫絳囊盛茱萸繫臂上登高飲菊花酒此禍可消景從其言舉家登山夕還雞犬皆暴死長房曰此可代之今人九

日登高是其遺事。仙書以茱萸爲避邪翁。菊花爲延壽客。九日詩多用落帽事。獨東坡南柯子詞云。破帽多情却戀頭。反之尤奇特。魏文帝與鍾繇書。歲往月來。忽復九月九日。尤爲陽數。而日月並應。俗嘉其名。以爲宜於長久。故以宴享高會。是月律中無射。言羣木庶草。無有射地而生者。惟芳菊紛然獨菲。非夫含乾坤之純和。體芬芳之淑氣。孰能如此。故屈平悲冉冉之將老。思飡秋菊之落英。輔體延年。莫斯之貴。謹奉壹束。以助彭祖之

術家禮云俗節則獻以時食元夕端午重陽皆有祭而照邑俱不舉行當以時新薦之以伸孝饗考孫氏儀範九日祭文云伏以農夫之慶百穀用成稷黍馨香適當時薦謹以重九祇率嘗事致嚴斯格仰冀鑒歆尙饗風土記漢俗九日飲菊花酒後除不祥韓衛公九日讌諸曹有詩曰莫嫌老圃秋容淡爲愛黃花晚節香李彥平深敬此語

詩

今日雲氣好水綠秋山明携壺酌流霞舉菊汎寒

榮地遠松石古風揚絃管清。窺觴照歡顏獨笑還
自傾落帽醉山月空歌懷友生。李白 梧小秋添

晚萸深節又當百年多此醉。壹笑展重陽山報衣
須倍花知閨勝常。莫疑籬色薄霜緩是初黃。沈佺

期開月重九

落拓滯他鄉節物驚陽九兀坐倦

登臨嗒然喪其偶。翩翩二妙來名出。召杜右促席
共論心。秋氣爽戶牖。玉屑繞座霏。梨橘可於口。嗟
予棄置材。安心學忍垢。暫借習家池。壹醉茱萸酒。
陶然脫衣冠。傾葢成三友。布鼓過雷門。頽顏無乃

厚素心類過從交澹此耐久先君三山詩草

秋

葉風吹黃颯颯晴雲日照白鱗鱗歸來特問茱萸
女今日登高醉幾人張謬不須三逕追元亮何

必龍山學孟嘉是處黃花是處酒漫言秋色屬誰
家曾弗人玉泉高會憶龍山笑語香生樽酒間

蒼翠秋空搔首望亂峯圍合碧雲閑重陽何事

必登高勝友招尋興倍豪昨夜白衣曾送酒相將

爛醉好題糕老至難言百事高論文載酒愧三

豪眼前花發鶴林似且把茱萸當鹿糕也知今

日是重陽無奈龍山屬客鄉。強欲登高登未得。閉
門深巷月昏黃。不甘辜負此重陽。典盡衣衫入
醉鄉。敢道柴桑風味在。白頭閒對菊花黃。重陽
節。屆懶登臺。好友招尋倦眼開。斷續山光聯地軸。
蒼茫海氣接天宮。方期載酒攀崖上。更爲談經入
座來。自笑年年虛九月。逢君始醉菊花杯。先君三

山詩草

欲賦前賢九日詩。茱萸相闕壹枝枝。可
憐宋玉情何限。爭似陶潛醉不知。綠鬢愛隨風景
變。黃花能與歲時期。登臨問處狂多少。笑殺高陽

拍手兒 李群玉

杜門欲避朔風侵。爲訪東籬不

自禁。對景都忘當世事。愛花猶是少年心。誰將秋色
深深染。好把瓊漿淺淺斟。聞道主人多穫黍。梅
開還向雪中尋。木落霜繁雁叫哀。重陽寂寞懶
登臺。愁心每至秋深動。笑口今從花下開。好友形
忘談。自劇主人情重酒頻來。興酣不覺更籌止。萬
丈雲霞海日催。 先祖瘦竹集

詞

九日歡遊何處好。黃花萬蕊雕欄遶。通體清香無

俗調天氣好。烟滋露結功多少。日脚清寒高下

照。寶釘密綴圓斜小。落葉西園風嫋嫋。催秋老。叢

邊莫厭金樽倒。

歐陽永叔漁家傲

霜降水痕收

淺碧粼粼露遠洲。酒力漸消風力軟。颼颼破帽多

情却戀頭。詩酒若爲酬。但把清樽斷送秋。萬事

到頭都是夢。休休。明日黃花蝶也愁。

蘇軾南柯子